

Elim deb, yurtim deb yonib yashash kerak!

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2013-yil 28-avgust, chorshanba № 66 (15704)

ҚАДР-ҚИММАТИМ, ТАЯНЧИМ ВА ИФТИХОРИМСАН, МУСТАҚИЛ ЎЗБЕКИСТОН!

ПРЕЗИДЕНТ ИСЛОМ КАРИМОВНИНГ «ШАРҚ ТАРОНАЛАРИ» ТЎҚҚИЗИНЧИ ХАЛҚАРО МУСИҚА ФЕСТИВАЛИНИНГ ОЧИЛИШИГА БАҒИШЛАНГАН ТАНТАНАЛИ МАРОСИМДАГИ ТАБРИК СЎЗИ

Муҳтарам фестиваль қатнашчилари!
Қадрли меҳмонлар!
Хонимлар ва жаноблар!

Аввало, дунёнинг қадимий шаҳарларидан бири бўлмиш Самарқанд шаҳрида, мана шу муҳташам Регистон майдонида тўпланиб турган сиз, азиз «Шарқ тароналари» халқаро мусиқа фестивали иштирокчиларини қутлашга, барча-барчангизга ўзимнинг самимий ҳурмат-эҳтиромимни билдиришга рухсат бергайсиз.

Бугунги мусиқа ва санъат форумида қатнашаётган юксак мартабали меҳмонларимизга — ЮНЕСКО Бош директори Ирина Бокова хонимга, Халқаро маданият ва санъат уюшмаси бош котиби Куо Ли Мин хонимга, Халқаро фольклор ижодиёти ташкилоти бош котиби жаноб Мун Хюнг Сукка, Осиё халқаро санъат фестивалари уюшмаси раиси жаноб Чен Шенглайга, Корея Республикаси Президентининг маданият ва санъат сиёсати масалалари бўйича маслаҳатчиси жаноб Хюнг Ван Ли ва бошқа қадрли дўстларимизга ўзимнинг чуқур ҳурмат ва ташаккуримни изҳор этаман.

Фестивалимизда халқаро миқёсда кенг танилган машҳур мусиқа арбоблари — Марокашдаги «Тимитар» халқаро мусиқа фестивали раҳбари жаноб Брахим Эл Мазнед, Япон мусиқа ассоциацияси президенти жаноб Кавасе Тадасуке, шунингдек, Афғонистон ахборот ва маданият вазири жаноб доктор Саид Махдум Рахин, Куала-Лумпур шаҳри мэри жаноб Датук Аҳмад Фейсал Толиб қатнашаётгани бизнинг анжуманимизга алоҳида эътироф ва нуфуз бағишлайди.

Халқаро фестивалимизда яна бир ҳурматли меҳмонимиз — Америка Қўшма Штатлари Конгрессининг аъзоси, таниқли сиёсатчи жаноб Жеймс Патрик Мораннинг иштирок этаётгани барчамизга катта мамнуният етказди.

Шу фурсатдан фойдаланиб, бугун мусиқа байрамимизда ҳозир бўлган хорижий давлатларнинг Ўзбекистондаги муҳтарам элчилари ва вакилларини қутлашни истардим.

Бугун биз жаҳоннинг 52 та давлатидан келган сиз, азиз меҳмонларимизни шарқона эҳтиром билан «Хуш келибсиз азим Самарқанд заминига, хуш келибсиз меҳмондўст Ўзбекистонимизга!» деб кутиб оламиз.

Ҳурматли дўстлар!

Бугун биз «Шарқ тароналари» халқаро мусиқа фестивалини юртимизда тўққизинчи бор ўтказмоқдамиз. Ҳар сафар навбатдаги фестивални ўтказар эканмиз, мазкур анжумани дунёнинг энг кўҳна шаҳарларидан бири бўлган Самарқандда ўтказиш ҳақида ЮНЕСКО томонидан қўллаб-қувватланган қароримиз нақадар тўғри бўлганига такрор ва такрор ишонч ҳосил қиламиз.

(Давоми 2-бетда)



САНЪАТ ВА ДЎСТЛИК ФЕСТИВАЛИ

Самарқанд шаҳрида 27 август куни

«Шарқ тароналари» тўққизинчи халқаро мусиқа фестивали бошланди

Мусиқа — инсониятнинг буюк кашфиёти, кўшиқ ўзига хос маънавий мулоқот воситасидир. Сўзда таърифлаб, қаламда тасвирлаб бўлмайдиган ҳис-туйғулар, тасаввур ва кечинмалар куй-кўшиқларда ўз ифодасини топади. Диллардан дилларга, эллардан элларга кўчади.

Президенти миз Ислам Каримов ташаббуси билан ташкил этилган «Шарқ тароналари» халқаро мусиқа фестивали халқлар ўртасида ҳамкорлик ришталарини мустаҳкамлаш, мусиқа ва кўшиқ орқали одамлар қалбида эзгу туйғуларни уйғотиш, муштарак томирларни бир-бирига яқинлаштиришдек олижаноб мақсадларга хизмат қилмоқда. 1997 йилдан буён ҳар икки йилда ўтказиб

келинаётган мазкур анжумани дунё халқларининг ноёб мусиқий мероси ва анъаналарини ривожлантириш, унутилган услуб ва мактабларни тиклаш, мамлакатимизнинг жаҳон миқёсидаги обрў-эътиборини янада юксалтиришда муҳим омил бўлаётир.

Юртимизда мусиқа санъати қадимдан ривожланган. Ургут туманидаги Мўминобод қишлоғидан 3 минг 300 йил муқаддам суяқдан ясалган най топилгани, кўҳна Афросиёб деворий суратларидаги машшоқ ва муғаннийлар тасвири, улуг алломаларимизнинг мусиқага оид фалсафий-эстетик қарашлари халқимизнинг қадимда ҳам мусиқий салоҳияти нақадар юксак бўлганидан далолатдир.

Абу Наср Форобий «Мусиқа ҳақида катта ки-

тоб» кўп жилдли асарини да товушларнинг вужудга келиши, куйлар уйғунлиги, ритм ўлчовлари ва турларини чуқур ўрганган. Рубоб, танбур, ного-ра, уд, қонун, най каби чолғу асбобларида куй чалиш қоидаларини турли жадваллар, геометрик чизмалар орқали шарҳлаб берган.

Абу Али ибн Сино «Тиб қонунлари» китобида юрак, асаб касалликларини мусиқа воситасида даволаш яхши самара беришини таъкидлаган. Бугунги кунда бутун дунёда кенг қўлланилаётган «мусиқа терапияси» услуби ана шу қоидага асосланади.

Комил Хоразмий Хоразм нотасини ихтиро қилиб, «Рост» мақомининг дебодчасини ушбу нотага туширган. Унинг «Танбур чизиқлари» асарида миллий муси-

қамиз тарихи ва назариясига оид қимматли маълумотлар келтирилган.

Айниқса, Амир Темур даврида фан ва маданиятнинг барча соҳаси қатори мусиқа ва кўшиқчилик санъати ҳам юксак даражада ривожланган. Самарқандда ўз даврининг энг машҳур созанда ва хонандалари, шоирлар жам бўлган, мушоиралар, мусиқий анжуманлар уюштирилган. Машҳур тарихчи Шарафиддин Али Яздий «Зафарнома» китобида шундай анжуманлар ҳақида «Яхши овозли хонандалар куйлашни бошлаб, ғазалу нақш айтур эрдилар. Ва турку мўғул, хитойу араб ва аямдин ҳар ким ўз расми билан нағма айтур эрди», деб ёзади.

(Давоми 2-бетда)

ПРЕЗИДЕНТ ИСЛОМ КАРИМОВНИНГ «ШАРҚ ТАРОНАЛАРИ» ТЎҚҚИЗИНЧИ ХАЛҚАРО МУСИҚА ФЕСТИВАЛИНИНГ ОЧИЛИШИГА БАҒИШЛАНГАН ТАНТАНАЛИ МАРОСИМДАГИ ТАБРИК СЎЗИ

(Давоми,
боши 1-бетда)

Асрлар давомида умумбашарий маданият ва цивилизация марказларидан бири бўлиб келаётган, афсонавий Шарқ тимсоли, ўзининг етти иқлимга машхур меъморий обидалари, буюк салоҳияти, гўзал ва сўлим табиати билан ҳар қандай одамни ўзига мафтун этадиган бу тарихий шаҳар энг юксак халқаро анжуманларни ўзида қабул қилишга ҳар томонлама муносибдир.

Бундай улугвор ва табаррук шаҳарнинг юраги бўлмиш, Регистон деб ном олган, дунёда кам учрайдиган бу мухташам сахна, ҳеч шубҳасиз, миллий мумтоз тароналарга янгича, бетакрор гўзаллик ва нафосат бахш этади, минг-минглаб санъат мухлисари хотирасида ўчмас из қолдиради.

Айнан Самарқанд заминида пойдевор қўйилган «Шарқ тароналари» фестивалининг ўз олдига қўйган гоё ва мақсадларини қисқача ифода қиладиган бўлсак, улар авваламбор мусиқа санъатини улуғлашга, унинг одамларга бўлган таъсирини ошириш, эзгу орзу-умидларни мусиқа орқали тараннум этишга ва шу асосда дунёдаги турли миллат ва элатларнинг вакиллари **ҳеч қандай таржимонсиз** бир-бирига боғлаш, дўстлик ва ҳамжихатликни янада мустаҳкамлашга қаратилгани билан айниқса эътиборлидир.

Муҳтарам фестиваль қатнашчилари!

Биз барчамиз сизларнинг тимсолингизда ана шундай буюк ва бебаҳо маънавий бойликни асраб-авайлаш ва ривожлантириш йўлида беғараз хизмат қиладиган, Шарқ-

нинг мумтоз санъатини янги-янги ёш авлодларга безавол етказиб келаётган фидойи инсонларни, мохир санъат усталари ва устозларини кўра-миз.

Шу маънода, бугун биз бошимиздан кечираётган нотинч ва ўта мураккаб бир замонда халқларни бир-бирига ўзаро яқинлаштириш, муштарақ илдизларни бир-бирига пайванд этишда, минтақа ва бутун дунёда тинчлик ва осойишталикни мустаҳкамлаш йўлида мусиқа санъатининг беқиёс кучи ва таъсирини намоён этишда «Шарқ тароналари» каби фестивалларнинг аҳамиятини ўлчаш ва қиёслаш қийин, десам, ҳақиқатни айтган бўламан.

Айни мана шундай олижаноб мақсадларни ўз зиммасига олган, турли-турли минтақа ва мамлакатлардан келган сиз, ҳурматли маданият

вакиллари азиз меҳмонларимиз сифатида қабул қиламиз, сизга берилган истеъдод ва талант олдида таъзим қиламиз.

Азиз фестиваль иштирокчилари!

Тобора улкан обрў ва эътибор топиб бораётган «Шарқ тароналари» халқаро мусиқа анжуманини юксак даражада ўтказиш учун пухта тайёргарлик кўриш ва керакли имкониятларни туғдириш албатта ташкилотчилардан, аввало Самарқанд аҳлидан катта масъулият талаб этишини ҳаммамиз яхши тушунамиз.

Бугун ҳеч иккиланмасдан айтиш мумкин: айна шундай тайёргарлик ишларида жонбозлик кўрсатган, ўзининг меҳмондўстлиги, ажойиб фазилатлари билан дунёда ном қозонган Самарқанд аҳлига барчангизнинг номингиздан, шахсан ўз номиндан самимий

миннатдорлик билдиришни ўзимнинг бурчим деб биламан.

Фурсатдан фойдаланиб, шу азим шаҳарда туғилиб ўсган, вояга етган инсон сифатида мен учун доимо азиз ва қадрдон бўлган Самарқанд халқи-га, кексаю ёш барча ҳурматли ҳамюртларимга фарзандлик меҳрим ва садоқатимни яна бир бор изҳор этиш менга чексиз хурсандчилик ва баланд руҳ бағишлайди.

Азиз юртдошларим!

Муҳтарам меҳмонлар! Барчангизни бағримга бошиб, бугунги гўзал байрам билан — «Шарқ тароналари» халқаро мусиқа фестивалининг очилиши билан яна бир бор табриклайман.

Ҳаммангизга сиҳат-саломатлик, бахту саодат, анжуман ишига муваффақият тилайман.

Эътиборингиз учун раҳмат.

САНЪАТ ВА ДЎСТЛИК ФЕСТИВАЛИ

(Давоми,
боши 1-бетда)

Президентимиз Ислмо Каримовнинг ташаббуси билан орадан қарийб олти аср ўтиб, бу анжуман «Шарқ тароналари» халқаро мусиқа фестивали тимсолида қайта тикланди. Бугун ҳам Самарқандда Мағрибу Машриқдан келган хонандаю созандалар жам бўлиб, ўз миллий қўшиқларини ижро этмоқда.

Самарқанд, Регистон майдони. 27 август, соат 19.00.

... Қадим миноралар, нилий гумбазлар ранго-ранг чироқлар ёғдусида жилоланади. Улуғвор обидалар қалбларга байрамона руҳ, анжуманга шуқуҳ бағишлайди. Майдондаги улкан амфитеатр анъанавий «Шарқ тароналари» халқаро мусиқа фестивалининг очилиш маросимида йиғилган томошабинлар билан тўлган. Улар орасида фестиваль қатнашчилари ва меҳмонлари, санъат намояндалари, мусиқашунос олимлар, санъат ихлосмандлари, чет эллик журналистлар, сайёҳлар бор.

Анжуман иштирокчилари Ўзбекистон Республикаси Президенти Ислмо Каримовни қарсақлар билан кутиб оладилар.

Карнай-сурнай, ноғора садолари янграйди.

Сўз Ўзбекистон Республикаси Президенти Ислмо Каримовга берилади.

Давлатимиз раҳбари «Шарқ тароналари» халқаро мусиқа фестивали иштирокчилари ва меҳмонларини кутлар экан, мазкур фестивалнинг мазмун-моҳияти, жаҳонда тинчлик ва миллатлараро тотувликни таъминлашдаги аҳамияти ҳақида тўхталди, фестиваль иштирокчиларига ижодий зафарлар тилади.

Маросимда сўзга чиққан ЮНЕСКО Бош директори



Сарвар ЎРМОҢОВ (ЎЗА) олган суратлар

Ирина Бокова Ўзбекистонда маданият ва санъатни ривожлантиришга алоҳида эътибор қаратилаётганини, Президент Ислмо Каримов томонидан асос солинган «Шарқ тароналари» фестивали ана шу эътиборнинг юксак намунаси эканини таъкидлади.

Мусиқа садолари остида мухташам сахнага фестиваль қатнашчилари — 52 мамлакат санъаткорлари кириб келади.

Истиқлол йилларида миллий мусиқамизни чуқур ўрганиш ва ривожлантириш борасида улкан ишлар амалга оширилди. Бойсун фольклори, Шашмақом, Катта ашула, Наврўз инсониятнинг энг дурдона кашфиётлари сифатида ЮНЕСКОнинг Бутунжаҳон номдодий мероси рўйхатида киритилди. Ўзбекистон давлат консерваторияси, ўнлаб театр ва маданият саройлари, санъат йўналишидаги коллеж ва лицейлар барпо этилди.

Давлатимиз раҳбарининг 2008 йил 8 июлда қабул қилинган «Болалар мусиқа ва санъат мактабларининг моддий-

техник базасини мустаҳкамлаш ва уларнинг фаолиятини янада яхшилаш бўйича 2009-2014 йилларга мўлжалланган Давлат дастури тўғрисида»ги қарори асосида болалар мусиқа ва санъат мактаблари фаолияти, мусиқа таълими изчил ривожлантирилмоқда.

«Ягонасан, муқаддас Ватан!», «Ниҳол», «Келажак овози», «Янги авлод», «Марду майдон» каби кўрик-танловлар мамлакатимиз ёшларининг истеъдодини юзага чиқаришга хизмат қиладир. «Асрлар садоси» халқаро фестивали халқимиз маънавий мероси ва замонавий санъат уйғунлигини жаҳон узра намойиш этмоқда.

Мусиқа оҳанг, тарона тили, дини ва урф-одати турлича бўлган барча миллат ва элатларни бирлаштирадиган қудратли воситадир. Юртбошимиз таъкидлаганидек, бу фестиваль ҳар бир одамни меҳру шафқатли, меҳру оқибатли бўлишга даъват этади, ер юзиде барқарорлик ва аҳиллик табиатини уйғотади.

«Шарқ тароналари»нинг мазмун-моҳиятида ана шундай умуминсоний қадриятлар мужассамлиги боис ҳам бу фестиваль дунё жамоатчилиги эътиборини тобора кенг қозонмоқда. Фестиваль жаҳондаги нуфузли мусиқа анжуманлари қаторидан муносиб ўрин эгаллади. Кўплаб мамлакатлар, халқаро маданият ташкилотлари, машхур санъат намояндаларининг бу фестивалга қизиқиши ва эътибори ортиб, иштирокчи мамлакатлар сафи кенгайиб бораётгани бунинг яққол далилидир. Хусусан, 1997 йилда ўтказилган биринчи фестивалда 31 мамлакат вакиллари қатнашган бўлса, бу йилги анжуманга Осиё, Африка, Европа ва Америкадаги 52 давлатдан санъат намояндалари ташриф буюрди. Фестиваль Бирлашган Миллатлар Ташкилотининг Таълим, фан ва маданият масалалари бўйича ташкилоти — ЮНЕСКО шафелигида ўтказилаётгани ҳам анжуманнинг юксак мақом ва нуфузини кўрсатади.

Ушбу фестиваль янги номларни кашф этиш, санъат ва санъаткорларни қўллаб-қувватлаш, айна чоғда миллий мусиқа санъатимизни, мамлакатимиз тараққиёти ва сайёҳлик салоҳиятини бутун дунёга намойиш этишда муҳим омил бўлмоқда.

Фестиваль санъаткорларнинг ижодий изланиши, ўзаро фикр ва тажриба алмашишида ҳам муҳим аҳамият касб этаётир. Анжуман доирасида ўтказиладиган турли маданий тадбирлар, «Шарқ мусиқа анъаналари замонавий маданият тизимида» мавзусидаги илмий конференция бунинг учун кенг имконият яратади.

Фестиваль қатнашчилари Регистон майдонидаги асосий сахнадан ташқари, шаҳардаги «Мўъжиза» ва «Ниҳол» амфитеатрлари, «Ёшлик» истироҳат боғи, Самарқанд, Пастдарғом, Жомбой, Оқдарё туманларида концерт дастурларини намойиш этиши, санъат ихлосмандлари билан учрашувлар кўзда тутилган.

Анжуман иштирокчилари ва меҳмонлари Самарқанднинг ноёб тарихий обидаларини зиёрат қилиш, афсонавий Шарқ тимсоли бўлмиш бозорларимизни кўриш, истиқлол йилларида амалга оширилган бунёдкорлик ишлари ва меҳмондўст халқимиз билан танишиш имкониятига эга бўлади.

Халқаро мусиқа фестивали очилишига бағишланган театрлаштирилган томошалар анжуман иштирокчилари ва меҳмонларида катта таассурот қолдириди. Фестиваль сунъий йўлдош орқали кўплаб хорижий мамлакатларга узатилди.

Ирода УМАРОВА,
Анвар САМАДОВ,
Ғолиб ҲАСАНОВ,
ЎЗА махсус мухбирлари

Криста ПИККАТ:

ЎЗБЕКИСТОНДА ТАЪЛИМ, ФАН ВА МАДАНИЯТ СОҲАЛАРИ ИЗЧИЛ РИВОЖЛАНМОҚДА

Мамлакатимиз мустақиллигининг 22 йиллиги арафасида Ўзбекистон Миллий ахборот агентлиги — ЎЗА мухбири ЮНЕСКОнинг Ўзбекистондаги ваколатхонаси раҳбари Криста ПИККАТ билан суҳбатлашди.

— **Суҳбатимиз Ўзбекистон Республикаси мустақиллигининг 22 йиллиги арафасида ўтмоқда. Ўзбекистонда истиқлол йилларида таълим, фан ва маданият соҳаларида амалга оширилаётган ислохотлар бераётган самаралар ҳақида фикрингизни билмоқчи эдик.**

— Президент Ислон Каримов мамлакатингиз мустақиллиги қўлга киритилганининг илк кунлариданок, ўша пайтда кўплаб иқтисодий-ижтимоий муаммолар бўлганига қарамай, таълим тизимини ривожлантиришга биринчи галдаги вазифа сифатида эътибор қаратганини яхши биламиз ва бундай ғамхўрликни жуда юксак қадрлаймиз.

Давлатингиз раҳбарининг бевосита раҳнамолигида ишлаб чиқилган «Таълим тўғрисида»ги қонун ва Кадрлар тайёрлаш миллий дастури асосида ўқув-методик жараёнлар замон талаблари даражасида тубдан ислоҳ қилинди. Замонавий таълим масканлари бунёд этилиб, уларнинг моддий-техник базаси мустаҳкамланди.

Бугунги кунда Ўзбекистон

ялли ички маҳсулотининг 8-10 фоизи ушбу соҳага йўналтирилмоқда. Таълим сифатини янада яхшилашга алоҳида эътибор қаратилмоқда.

Шу боис Ўзбекистоннинг Таълим бўйича глобал ҳамкорлик дастурига аъзолиги доирасида яратилган Таълимга оид режаси бу борадаги ишлар сифати ва самарадорлигини янада оширишга хизмат қилади, деб ишонаман.

Илмий ишланма ва кашфиётлардан самарали фойдаланиш, иқтисодиёт ва жамиятнинг ўзгарувчан талаблари ўртасидаги мутаносибликни таъминлаш мамлакатлар ривожига муҳим ўрин тутди. Ўзбекистонда инновацион ғояларни ҳаётга татбиқ этиш, илмга таянган иқтисодиётни ривожлантиришга алоҳида эътибор қаратилаётгани жуда қувонарли. Олий таълимдан кейинги таълимни такомиллаштириш, мутахассислар малакасини мунтазам ошириб бориш, илмий тадқиқотларни қўллаб-қувватлаш борасидаги ишлар бунда муҳим омил бўлаётди.

Ўзбекистон бой маданий-маънавий меросга эга. Мамлакатингиз маданият соҳасига

оид кўплаб халқаро норматив ҳужжатларни ратификация қилган. Самарқанд, Бухоро, Хива ва Шахрисабз шаҳарлари, юртингиздаги 140 маданий ва тарихий ёдгорлик ЮНЕСКОнинг Бутунжаҳон маданий мероси рўйхатига киритилган. Ўзбекистон халқи бу ноёб меросни, урф-одатлари ва анъаналарини асраб-авайлаб келмоқда.

Ўзбекистон билан фан-таълим, маданият ва ахборот соҳаларини қамраб олган ҳамкорлигимиз кўлами тобора кенгайиб бормоқда. Бу ҳамкорликни янада мустаҳкамлаш, ўзаро фикр ва тажриба алмашишга доим тайёримиз.

— **Бугунги ўзбек ёшлари, уларнинг орзу ва интилишлари, турли соҳаларда эришаётган муваффақиятлари тўғрисида нима дея оласиз?**

— Ўзбекистон ёшлари — мамлакатнинг улкан салоҳиятидир. Ўзбекистоннинг соғлом ва баркамол авлодни тарбиялаш, уларнинг ижодий ва интеллектуал салоҳиятини ошириш борасидаги ишлари алоҳида эътиборга молик. Буларнинг барчаси Ўзбекистон ёшлари учун мамлакатингизда ёш авлод камолоти йўлида яратилган кенг имкониятлардан унумли фойдаланиб, келажакда халқингиз манфаати йўлида камарбаста инсонлар бўлиб етишишдек масъулиятли вазифани кўяди.

Мен Ўзбекистонда бир йилдан буён фаолият юритиб кел-

япман. Мамлакатингиз ёшлари билан мулоқотда бўлиб, уларнинг янгича фикрлайдиган, Ватан тақдири, унинг бугуни ва келажакга дахлдорлик ҳисси билан яшайдиган ёшлар эканига амин бўлдим.

Таълим тизимининг умумий ўрта, ўрта махсус ҳамда олий таълим тизимидан иборат барча босқичида замонавий билим ва касб-хунарларни пухта эгаллаган, чет тилларда эркин сўзлашадиган, жисмонан чиниққан, эътиқоди мустаҳкам авлод вояга етмоқда.

Мамлакатингиз ёшларининг гуманитар ва техник билимларни ўзлаштириш ва амалда қўллаш борасида эришаётган ютуқлари Ўзбекистоннинг буюк истиқболига хизмат қилади. Ўзбекистон ёшлари сўнгги йилларда ЮНЕСКО томонидан ёш олимлар учун ўтказиладиган танловда фаол иштирок этиб, совринли ўринларни қўлга киритмоқда. ЮНЕСКО барқарор ривожланишни таъминлаш йўлида маданий ва илмий соҳаларда изланиш олиб бораётган ёш ва иқтидорли олимларни бундан кейин ҳам қўллаб-қувватлайверади.

— **Самарқанд шаҳрида ЮНЕСКО билан ҳамкорликда ҳар икки йилда ўтказиладиган «Шарқ тароналари» халқаро мусиқа фестивали ҳақида ҳам тўхталиб ўтсангиз.**

— «Шарқ тароналари» халқаро мусиқа фестивали ранг-

баранг маданиятлар, асрий анъаналарни мусиқа орқали бирлаштириб, халқлар ўртасидаги дўстликни, тинчлик-осойишталикни мустаҳкамлашга хизмат қилмоқда. Номоддий маданий меросни сақлаш, муҳофаза қилиш ва келажак авлодга етказишга улкан ҳисса қўшаётди. Номоддий маданий мерос шу меросни авлоддан авлодга ўтказадиган жамият ва гуруҳларга ўзликни намоён қилиш, инсониятнинг ижодкорлик салоҳиятини оширишга хизмат қилади. Шу сабабли бой маданий ранг-барангликни, хусусан, мусиқа санъатини жаҳонга кенг намоён этишда номоддий маданий меросни сақлаш ва муҳофаза қилиш жуда муҳимдир.

Ўзбекистонда ЮНЕСКОнинг 2003 йилда қабул қилинган Номоддий маданий меросни муҳофаза қилиш бўйича халқаро конвенцияси ижросини таъминлаш борасида улкан ишлар амалга оширилмоқда. Самарқанд шаҳрида ЮНЕСКО шафелигида ҳар икки йилда ўтказиладиган «Шарқ тароналари» халқаро мусиқа фестивали нафақат Ўзбекистон, балки бутун дунё номоддий маданий меросини тиклаш, асраш, тарғиб қилиш ва авлоддан авлодга етказишга ўзининг бекиёс ҳиссасини қўшмоқда.

**ЎЗА мухбири
Нодира МАНЗУРОВА
суҳбатлашди.**

МУВАФФАҚИЯТ ФОРМУЛАСИ

Istiqlol farzandlari



Жорий йил кимё фани бўйича ўтказилган 45-халқаро олимпиадада Тошкент педиатрия тиббиёт институти қошидаги 1-академик лицей ўқувчиси Бехзод Болтаев олтин медалга сазовор бўлди.

Мамлакатимизда ёшларга оид пухта ишлаб чиқилган ва истиқболни кўзлаб, изчиллик билан юритилаётган давлат сиёсати ўғил-қизларимизнинг халқаро фан олимпиадалари, интеллектуал беллашувлар, санъат фестиваллари, ижодий танловлар, нуфузли кўргазмалар, спорт мусобақаларидаги зафарларида муҳим омил бўлаётди.

... Бехзодни дарс машғулоти жараёнида учратдим. Оддий, камтар, хушмуомала бу ўспирин таътил даврида ҳам қатъий кун тартибига риоя этаётганига ҳавасим келди. Эрталаб соат олтида спорт билан шуғулланишни — сузишни қанда қил-

майди. Сўнг лицейга йўл олади. Кимё фанининг биологик, таҳлилий, физик, органик, аорганик турлари бўйича қўшимча дарсларга «шўнғийди»... Компьютер саводхонлиги, инглиз тилидан билимни тобора мустаҳкамлаш, бадий китоб мутолааси, уй юмушларига кўмаклашиш, қадрдон дўстлар билан дийдорлашишни ҳам унутмайди.

Болаликдан кун тартибидан тўғри белгилаш, вақтни унумли тақсимлашни одатга айлантгани Бехзодда қатъий интизом, мустаҳкам ирода, кунт, зийраклик каби фазилатларни шакллантирди. Мирзо Улуғбек туманидаги 279-умумтаълим

мактабда ўқиётганида она тили ва адабиёт, кимё каби фанлар бўйича билимлар беллашувининг туман, шаҳар босқичларида юқори ўринларни эгаллади. Аини пайтда Бехзод мактаб қошида ташкил этилган тэквондонинг ITF йўналиши бўйича ҳам спорт секциясига қатнайди. Бехзод таэквондо бўйича 2007, 2009, 2012 йилларда ўтказилган мамлакат чемпионатида уч карра Ўзбекистон чемпиони бўлди.

Жорий йил Бехзод учун чинакам изланиш, билимлар чўққиси сари интилиш, зафарлар йили бўлди. Март ойида кимё фани бўйича фан олимпиадасининг Тошкент шаҳар босқичида муваффақият қозонди. Сўнгра Тошкентда 24 апрелдан 1 майга қадар бўлиб ўтган ўқувчилар ўртасидаги кимё фанидан 47-халқаро Менделеев олимпиадасида иштирок этди. Юртимизнинг таълим соҳасидаги исло-

хотлари, бугунги тинч ва осуда ҳаётимиз, ёшлар камолоти йўлидаги улкан эътиборни жаҳон ёшларига яна бир бор намоёйиш этган ушбу билимлар беллашувидан 17 мамлакатдан 118 нафар йигит-қиз иқтидорини синовдан ўтказди. Турли мураккабликдаги масалалар, назарий билим, лаборатория ишига оид билимини халқаро миқёсдаги ҳакамлар ҳайъати «чиғириғи»дан муваффақиятли ўтказган Бехзод олимпиадада иккинчи ўринни қўлга киритди.

— Президентимиз Ислон Каримов раҳнамолигида мамлакатимизда ёшлар ўз салоҳиятини намоён этиши учун зарур барча шароитнинг яратилгани фарзандларимиз ютуқларида муҳим омил бўлаётди, — дейди Бехзоднинг отаси Матёқуб Ширинов. — Оиламизда фарзандларимизнинг пухта таълим олиши, спорт билан шуғулланиши, адабиёт, хорижий тиллар, компьютер технологияларини ўрганиши учун ижодий муҳит ҳам, имконият ҳам етарли.

Шу йилнинг 15 — 24 июль кунлари Москвада бўлиб ўтган кимё фани бўйича 45-халқаро олимпиадада 77 давлатдан уч юзга яқин 20 ёшгача бўлган йигит-қиз иштирок этди. Та-

лаб ҳам, рақобат ҳам жуда кучли бундай беллашувда Бехзод билан бирга, Мирзо Улуғбек номидаги Ўзбекистон Миллий университетининг С.Сирождидинов номидаги академик лицейи ўқувчилари Дилшоода Ортиқбоева, Билолиддин Шаробиддинов дастлабки турда органик моддалар синтези, кимёвий таҳлил, полимерлар анализи сингари мураккаб лаборатория жараёнларини муваффақиятли бажарди. Кейинги босқичда эса ўнга яқин кимёвий масала ишланди. Натижалар эълон қилиниб, ўзбекистонлик Бехзод Болтаев биринчи ўринни эгаллагани маълум бўлганида, ёш ҳамюртимиз қувончу ҳаяжонининг чеки йўқ эди. Буюк Британия, Франция, Германия, Испания, Япония сингари давлатлар вакиллари бундай юксак натижалардан анча орқада қолган эди.

— Бундай олимпиадининг топшириқлари, кимёвий масалаларини ечишда баъзи тажрибали ўқувчилар ҳам қийналади, — дейди Тошкент педиатрия тиббиёт институти қошидаги 1-академик лицей директори Ортиқбой Эшонқулов. — Аини пайтда ўзбек ёшлари бу топшириқларни муваффақиятли бажариб, бир олтин, иккита бронза медал-

ни қўлга киритганидан бошимиз кўкларга етди. Бундай ютуқлар замирида Президентимиз раҳнамолигида таълим соҳасида изчиллик билан амалга оширилаётган ислохотларнинг юксак самаралари мужассамдир.

Бехзоднинг орзуси — шифокор бўлиш.

— Давлатимиз раҳбари томонидан биз, ёшлар учун яратилган улкан имкониятлар шарофати билан шундай ютуқларга эришаётимиз, — дейди Бехзод. — Ўзбекистондек бой маънавий меросга эга, жаҳон илм-фани ривожига муносиб ҳисса қўшган мутафаккир аждодларимизга бешик бўлган, фарзандлари меҳр ва ардоқдаги табарруқ дийёрнинг фарзанди эканимдан ғоят фахрланаман.

Кимё — турли формулаларга бой, мураккаб ва қизиқарли фан. Бехзод билан суҳбатлашиб, юртимизнинг минглаб иқтидорли ёшлари эришаётган ютуқларнинг формуласини англаб етгандек бўлам. Доимий эътибор ва ғамхўрлик, кунт, билим ва меҳнат, истеъдод ва қобилят, буюк аждодларимизга муносиблик масъулияти — муваффақиятнинг асосий қалитидир.

**Назокат УСМОНОВА,
ЎЗА мухбири**

Машҳурлар ёшлар даврасида

Bayram shukhi

«Кадр-қимматим, таянчим ва ифтихоримсан, мустақил Ўзбекистон!» шиори остида қарши олинаётган мустақиллигимизнинг 22 йиллиги юртимизнинг барча ҳудудларида кенг нишонланмоқда. Жойларда байрам муносабати билан турли маданий-маърифий тадбирлар, фестиваллар ва спорт мусобақалари ташкил этилмоқда.

Сирдарё вилоятида ҳам шундай улуғ ва эзгу байрамни муносиб кутиб олиш мақсадида туман ва қишлоқларда ёшлар фестиваллари бўлиб ўтмоқда. Сайхунобод туманида ташкил этилган «Кадр-қимматим, таянчим ва ифтихоримсан, мустақил Ўзбекистон!» шиори остидаги ёшлар фестивалида Ўзбекистон халқ артистлари — режиссёр Шухрат Аббосов, актёрлар — Хайрулла Саъдиев, Лутфулла Саъдуллаев, киноактрисалар — Му-

қаддас Саъдуллаева, Севара Солиева, Наргиза Раҳмонова иштирок этди.

Фестиваль доирасида бир қатор ўзига хос лойиҳалар ташкил этилди. Хусусан, «Ҳоким ва ёшлар», «Сиз севган қахрамонлар» каби тадбирларда мустақилликни асраб-авайлаш, ёш авлодни ватанпарварлик руҳида тарбиялаш, истиқлол йилларида амалга оширилган ислохотлар ва уларнинг мазмун-моҳияти ҳақида ёшларга гапириб берилди.

Ёшлар фестивалида «Камолот» ёшлар ижтимоий ҳаракати Сайхунобод тумани кенгаши томонидан ўтказилган турли тадбирларда ўзининг фаоллиги билан юқори натижаларни қўлга киритиб келаётган ёшлар турли номинациялар бўйича тақдирланди. Унга кўра, «Энг намунали бошланғич ташкилот етакчиси» номинацияси ғолиблигига 19-мактабдаги «Камолот» ЁИХ бошланғич ташкилоти етакчиси Нодир Мирзаев, «Энг намунали маҳалла раиси» номинацияси ғолиблигига «Гулбулоқ» маҳалла фуқаролар йиғини раиси Абдурасул Қаршибоев, «Энг намунали коллеж етакчиси» номинацияси ғолиблигига Сайхунобод саноат касб-хунар коллежи бошланғич ташкилоти етакчиси Хуршид



Норматов сазовор бўлди. Шунингдек, туман маданият ва спорт ишлари бўлими ходими Раҳмон Баҳромов, «Келажак овози» кўрик-танловининг вилоят босқичи ғолиби Гулҳаё Эрназарова, гимнастикачи Муҳайё Сирожиддинова, «Бунёдкор» меҳнат гуруҳининг фаол аъзолари ҳамда туман болалар ва ўсмирлар спорт мактаби директори Аҳбор Ёқубов ҳам фестивалдаги фа-

олиги учун тақдирланди.

Фестиваль санъаткорларининг дилтортар куй-қўшиқларидан иборат концерт дастурига уланиб кетди. Сайхунободлик ёшлар меҳмонлар билан эсдалик учун суратга тушди.

Элёр ЖўРАЕВ,
«Камолот» ЁИХ Сирдарё
вилояти кенгаши
матбуот хизмати етакчи
мутахассиси

Меҳрга муносиблар...

Урганч туманидаги «Шодлик» болалар ёзги оромгоҳида ички ишлар идоралари профилактик ҳисобида турувчи вояга етмаганлар учун тарбия ва спорт-соғломлаштириш оромгоҳи ташкил қилинди. Ушбу лойиҳа Ҳаракатнинг Хоразм вилояти кенгаши ва ички ишлар бошқармаси билан ҳамкорликда амалга оширилиб, бу йил унга юз нафарга яқин бола жалб этилди.

Бир ҳафта мобайнида болалар учун турли мавзулардаги маданий-маърифий ва спорт-соғломлаштириш тадбирлари ўтказилди. «Мен аскар бўламан!» шиори остида ҳарбий хизматчилар билан бўлиб ўтган давра суҳбатлари, «Шунқорлар» ва бошқа шу каби ҳарбий-спорт мусобақалари ҳамда ўйинлар ёшларга, айниқса, манзур бўлди. Лойиҳа иштирокчилари, шунингдек, волейбол, футбол, баскетбол, енгил атлетика бўйича ўзаро беллашдилар.

— Оромгоҳда болаларнинг вақти мазмунли ўти-

шига ҳаракат қилдик, — дейди «Камолот» ЁИХ вилоят кенгаши бўлим мудири Мардон Раҳмонов. — Шу мақсадда лойиҳа дастурига ҳуқуқий, сиёсий, диний, маънавий-маърифий мавзулардаги давра суҳбатлари киритилди. Ёшлар вилоят ҳокимлиги, Ҳаракатнинг вилоят кенгаши ва кенгаш қошидаги «Ёш тадбиркор» консультатив маркази мутахассислари, ҳуқуқни муҳофаза қилувчи органлар ходимлари, вилоят ИИБ профилактика инспекторлари билан бевосита мулоқот қилиб, ўзларини қизиқтирган саволларга жавоб олиш-

ди. Бундан ташқари, оромгоҳда Тошкент тиббиёт академиясининг Урганч филиали «Камолот»чиларидан иборат тарғибот гуруҳи фаолият олиб борди. Академия талабалари ҳар куни болалар билан учрашиб, кийиниш маданияти, ОИТС, тативуровка ва пирсинг, рангли ва газли ичимликларнинг организмга зарарли таъсири, тамаки ва нос чекиш, спиртли ичимликларни истеъмол қилишнинг аянчли оқибатлари каби долзарб мавзуларда қизиқарли суҳбатлар олиб боришди.

— Оромгоҳ ҳаётимга янгилик олиб кирди, мен бу ерда кўплаб дўстлар орттирдим, — дейди Хива туманидан келган Бахтиёр Бойжонов. — Биз турли тадбирларда қатнашиш асносида бир-биримиз билан аҳил-иноқ бўлишни ўргандик. Мен шу кунларда юрт келажаги биз,

ёшлар қўлида экани, бунинг учун ҳар биримиз иллатлардан узоқ бўлиб, фақат бунёдкорлик ишлари билан шуғулланишимиз ва ҳаммиса Ватанимизга содиқ фарзанд бўлишимиз кераклигини теран тушуниб етдим. Оромгоҳни ташкил этган, бизнинг тарбиямиз учун қайғураётган «Камолот»чи ака-опаларимга самимий раҳматимни айтаман.

Ҳафта якунида «Хайр, оромгоҳ!» мавзуида танлов ўтказилиб, унда иштирок этган барча тарбияланувчилар «Камолот» ЁИХ вилоят кенгаши томонидан эсдалик совғалар билан тақдирланди.

Зухроб МАТМУРОДОВ,
«Камолот» ЁИХнинг
Тошкент тиббиёт
академияси Урганч
филиалидаги бошланғич
ташкilotи етакчиси

Жонкуяр мураббий қиз

Бугун юртимизда қай соҳага қараманг, шижоатли тенгдошларимизнинг чин кўнгилдан, астойдил меҳнат қилаётганига гувоҳ бўласиз. Шундай жонкуяр қизлардан бири сўхлик Рухшона Жумаевадир.

Рухшона дастлаб ўзи таҳсил олган Сўх қишлоқ ҳўжалиги касб-хунар коллежида бадий гимнастика сирларини эгаллади. Коллежни тамомлаб, орзусини рўёбга чиқарди — Сўх тумани «Лимбур» МФИдаги 18-мактабда бадий гимнастика бўйича тўғарак ташкил этди. Бугунги кунда мазкур тўғарак аъзолари эллик нафардан ошди. Улар ўзгача иштиёқ билан шуғулланишмоқда.

— Ватан равнақи, осойишталиги — энг буюк бахт, — дейди мураббий қиз Рухшона Жумаева. — Юрт тинчлигидек бебаҳо неъмат қадрига етиб, унинг тараққиётига ҳар биримиз муносиб ҳисса қўшишимиз лозим. Ҳар



ким берилган имкониятлардан тўла унумли фойдаланиб, мустақилликни асраб-авайламоғи керак.

Бахтимиз шуки, тенгдошларимиз орасида Рухшона каби интилувчан, ғайратли, ватанпарвар ёшлар бисёр. Уларнинг юрагида она юрт меҳри вулқондай гумбурлаб садо беради. Вата-

нимизнинг ҳар бир фуқароси юрт учун шундай қайғуриб, унинг келажагини буюк этишга астойдил ҳаракат қилса, юртимиз бундан ҳам обод, турмушимиз янада фаровон бўлади.

Нодиржон ЮСУПОВ,
«Turkiston» мухбири

Bolalar sporti

To'g'ri yo'l

Хатога йўл қўйган одамни яхши томонга бошқариш, эзгуликка бошлаш инсон маънавиятига хос олий қадриятдир. Айниқса, вояга етмаганлар билан ишлашда тўғри йўл тутилса, кўзланган мақсадга эришиш мумкин.

Мазмунли етти кун

Жиззах вилояти Зомин туманида жойлашган «Алоқачи» болалар оромгоҳида ички ишлар идораларининг профилактик ҳисобида турувчи вояга етмаганлар учун тарбия ва спорт-соғломлаштириш оромгоҳи ташкил этилди. Албатта, бундан мақсад вояга етмаганлар орасида ҳуқуқбузарлик ва жиноятчиликнинг олдини олиш, уларни соғлом турмуш тарзи талаблари асосида тарбиялаш, бўш вақтларини мазмунли ўтказиш, ИИБ профилактик ҳисобида турувчи вояга етмаганларни ҳисобдан чиқариш ва юқоридаги салбий кўрсаткичларни камайтиришдир. Етти кунлик ҳарбий-спорт оромгоҳи ёшларнинг тарбияси ва руҳиятида қайсидир даражада ижобий ўзгариш ясади, десак, муболаға бўлмайди. Оромгоҳга жалб этилган ёшлар вилоятнинг таниқли спорт усталари, ёш шоирлар, маданият ходимлари билан учрашди. Вилоят сардорлар кенгаши томонидан интерфаол ўйинлар, семинар-тренинглар, спорт мусобақалари ташкил этилди. Оромгоҳга шаҳар, туманлардан жалб этилган 51 нафар ёшга «Камолот» ЁИХ вилоят кенгашининг эсдалик совғалари ҳамда фахрий ёрлиқлари топширилди.

Йигирма нафар ички ишлар профилактик ҳисобида турган вояга етмаганга ташкил этилган оромгоҳ давомида фаоллиги, интизоми, хулқи ижобий томонга ўзгаргани сабабли, Ҳаракатнинг Жиззах вилояти кенгаши томонидан ички ишлар профилактик ҳисобидан чиқариш учун тавсияномалар берилди.

Иноятулла ОТАМУРОДОВ,
«Камолот» ЁИХ Жиззах вилояти
кенгаши фаоли

Ҳашарда ҳамжихат тенгдошларимиз

Халқимизда ажойиб анъана бор: кимдир тўй қилмоқчи бўлса, тайёргарликни бир неча ой олдин бошлайди. Уйларни бўёқ-сувоқ қилиб, ён-атрофни тартиб келтиради. Ҳамма иш саришта бўлгач, маҳалла-қўй ва қўни-қўшнилари билан кенгашиб, тўйни бошлайди. Бугун мамлакатимизда ҳам истиқлол тўйимизга катта ҳозирлик кўрилмоқда. Шу муносабат билан 24-25 август кунлари юртимиз бўйлаб ўтказилган умумхалқ хайрия ҳашари уюшқоқликда амалга оширилди. Шу кунлари эрта тонгдан ҳашарга отланган юртдошларимиз кўча-хийбонларни, ариқ ва зовурларни тозалаш, чиқиндиларни чиқаришди. Дарахтларга шакл бериб, оқлашди. Яхши ният билан манзарали кўчатлар ўтқазилди. Бу борада «Камолот» ёшлар ижтимоий ҳаракатининг барча туман, шаҳар, вилоят кенгашлари томонидан ҳам кенг қўламли ободонлаштириш ва кўкаламзорлаштириш ишлари амалга оширилди.

ШАРҚ ТАРОНАЛАРИ ЖАРАНГЛАЁТГАН ГЎШАДА

Энг улуғ ва энг азиз байрамимиз олдидан ташкил этилган умумхалқ ҳашарида бир гуруҳ самарқандлик тенгдошларимиз эрта тонгданок энг шимариб, тозалаш ва ободонлаштириш ишларига киришиб кетди.

Маълумки, шу кунларда Самарқанд шаҳрида «Шарқ тароналари» IX халқаро мусиқа фестивали бўлиб ўтаётди. Шу муносабат билан шаҳарда катта бунёдкорлик ва ободонлаштириш ишлари олиб борилди. Албатта, бу ишларга каттаю кичик бирдек ўз ҳиссасини қўшди. Бу умумхалқ ҳашарида янада яққолроқ намоён бўлди. Шу кунлари Ҳаракатнинг Самарқанд шаҳар кенгаши аъзолари томонидан шаҳарнинг марказий кўчаларида янги гулзорлар барпо этилди, мавжудлари бегона ўтлардан тозаланиб, янги гуллар экилди. Дарахтларга шакл берилиб, таги юмшатилади.

— Умумхалқ ҳашарида биз ҳам барча ҳамшаҳарларимиз сингари меҳнат қуролларини олиб, темир йўл вокзали майдонига келдик. Бу ерда ҳашарга чиққан кўнгилли тенгдошларимизни кўриб, жуда қувондик. Улар билан йўл ёқасидаги гулларни сўғориб, дарахтларни бутадик, — дейди Самарқанд шаҳар сардорлар кенгаши раиси Садриддин Қаршибоев.

— Бугун шаҳримизнинг тобора чирой очиб бораётганини кўрган инсоннинг баҳри дили очилади. «Шарқ тароналари» халқаро мусиқа фестивали муносабати билан шаҳримизга кўплаб сайёҳлар келган. Шаҳримиз тозаланиб, ободлигига муносиб ҳисса қўшиш учун ҳашарда фаол қатнашдик. Биз, ёшлар мана шу анъанани унутмасдан, келажак авлодга ҳам сингдириб боришимиз лозим, — дейди Самарқанд давлат университетидаги «Камолот» ЁИХ бошлангич ташкилоти етакчиси Ҳ.Тўхтаев.

«ЁШЛАР КЎЛИ»ДА ҲАШАР

Бугун Хоразм воҳасида ҳар қачонгидан-да кенг қўламли бунёдкорлик ва ободонлаштириш ишлари олиб борилмоқда. Бунга ёшлар ҳам муносиб ҳисса қўшмоқда. «Камолот» ЁИХ Урганч шаҳар кенгаши ташаббуси билан шаҳарда барпо этилаётган «Ёшлар кўли» ҳудудида ҳашар ташкил қилинди. Унда вилоятнинг барча туманларидан жалб этилган уч минг нафарга яқин ёшлар, шунингдек, корхона ва ташкилотларда меҳнат қилаётган ёш ишчи-ҳодимлар қатнашди.

— «Ёшлар кўли» янги дам олиш объекти ҳисобланиб, уни мамлакатимиз мустақиллигининг 22 йиллиги арафасида фойдаланишга топшириш кўзда тутилган, — дейди «Камолот» ЁИХ Урганч шаҳар кенгаши раиси Фозил Болтаев. — Шу боис бу ердаги ҳашар нақ ўн кунга мўлжалланди. Айни вақтда объектдаги деярли барча қурилиш ишлари ўз ниҳоясига етган. Бу жараёнда «Бунёдкор» ёшлар меҳнат ҳаракати аъзолари ҳам фаоллик кўрсатганини алоҳида таъкидлаш лозим.



Носир Ҳайдаров олган сурат

Ҳозир кўл ҳудуди ва атрофи ободонлаштирилмоқда. Ҳашарнинг биринчи кунларида ёшлар томонидан йўлаклар супурилиб, манзарали дарахтлар оқланди ва уларга шакл берилди.

«Камолот»чилар «Ёшлар кўли»нинг очиши маросимини ҳам ана шундай уюшқоқлик билан ташкил этишни режалаштиришган.

«ҒАМХЎРЛИК» ГУРУҲИНИНГ ҒАМХЎРЛИКЛАРИ

Шу кунларда Тошкент вилоятининг фаол «Камолот»чилари ҳамда сардорлар кенгаши аъзолари иштирокида ёшлар ҳашари ташкил этилди. Икки кунлик ҳашар ишларида 221,4 гектар майдон, беш юз километрга яқин ариқ ва зовурлар, 140 та қабристон ва зиёратгоҳ тозаланиб, ободонлаштирилди. Ёлғиз яшовчи қариялар, эҳтиёжманд оилалар ҳолидан хабар олиниб, уларга мурувват ёрдамлари кўрсатилди.

Ҳаракатнинг вилоят кенгаши ходимлари эса Юқори Чирчиқ туманидаги «Дўстлик» ўйингоҳи ҳудудида олиб борилган ободонлаштириш ишларида иштирок этишди.

— Бу галги ҳашарда ёшлар ободонлаштириш ишларини ўз уйлари, кўча ва маҳаллаларидан бошлашди, — дейди «Камолот» ЁИХ Тошкент вилояти кенгаши бўлим мудир Дилором Абдуғафорова. — Улар ўзлари яшаётган маҳалладаги ёлғиз қариялар хонадонларига бориб, уй юмушларига кўмаклашди. Бунда, асосан, Ҳаракатнинг туман ва шаҳар кенгашлари қошида ташкил этилган «Ғамхўрлик» гуруҳлари фаол иштирок этди.

Ҳаракатнинг Зангиота, Қибрай тумани ҳамда Чирчиқ шаҳар кенгаши томонидан ташкил этилган ҳашарда ҳудудларда жойлашган қабристон ва зиёратгоҳлар ободонлаштирилди. Дарахтларга шакл берилиб, гуллар экилди.

— Ҳар бир ҳашар ва ободонлаштириш ишлари туманимизда кўтаринки руҳда ўтказилади. Чунки ҳашар орқали ҳар биримизнинг кўнгилмизда юртга меҳр туйғуси ошиб бораверади. Икки кунлик ҳашар тадбирларида туманимиз ҳудудидаги қабристон ва зиёратгоҳларда, кўча ва хийбонларда ободонлаштириш ишларини олиб бордик. Бошлангич ташкилот етакчиларига бириктирилган ёлғиз яшовчи қариялар томоқларини тартибга келтириб, гул экдик, — дейди қибрайлик «Камолот» фаоли Гавҳар Норматова.

Юртимиз гўзаллигига янада тароват улашиш, мустақиллик байрамини муносиб кутиб олиш, юртдошларимиз қалбида Ватанини улуғлаш, энг асосийси, уни асраб-авайлаш мақсадида ташкил этилган бундай хайрли тадбирларда иштирок этиш ҳар биримизнинг бурчимиздир.

ҲАШАР ОШИ

Ҳашар кунлари Ҳаракатнинг Ромитан тумани кенгаши «Озод ва обод юртга ҳашарлар ярашади» шиори остида «Ўба» маҳалла фуқаролар йиғини ҳудудида жойлашган «Баҳру Шайх» қабристонда ёшлар ҳашарини ўтказди. Унда маҳалладаги кўнгилли ёшлар Ҳаракатнинг туман кенгаши ходимларига бирлашиб, ободонлаштириш ишларини олиб боришди.

Ҳашарчилар икки гектарга яқин ҳудудни турли чиқинди ва хаслардан тозалашди. Шу билан бирга, саксондан ортиқ қаровсиз қолган қабрларнинг ён-атрофи ободонлаштирилди. Ёшларни бирлаштирувчи бундай хайрли тадбирлар, ёшлар онгида юртга муҳаббат, аجدодлар руҳига ҳурмат туйғуларини шакллантиришда муҳим аҳамиятга эга.

Ҳашар сўнггида тумандаги «Ўба» фермер хўжалиги томонидан ҳашарчиларга дастурхон ёзилиб, ош тортилди.

ЁШЛАР БЕФАРҚ ЭМАС

Ҳашарда чилонзорлик «Камолот»чилар ҳам фаол қатнашди. Улар «Озод юртга обод манзиллар ярашар!» шиори остида тумандаги қабристон ва зиёратгоҳларда ҳамда «Камолот» боғида ободонлаштириш ишларини уюшқоқлик билан олиб боришди.

Ҳашар ишларига Ҳаракатнинг туман кенгаши ходимлари, «Камолот» фаоллари, сардорлар ва маҳалла ёшлари жалб этилди. Улар жойлардаги маиший ва қурилиш чиқиндиларини тўплаб, техника ёрдамида олиб чиқишди. Дарахтларга шакл берилиб, кесилган шох-шаббалар олиб ташланди.

— Бугун истиқлолимизнинг 22 йиллиги тантанаси олдидан уюштирилган умумхалқ ҳашарида қатнашаётганимдан хурсандман. Сабаби менинг ҳам шу юрт ободлигига ҳиссам қўшиляпти. Ҳашарга келган тенгдошларим билан суҳбатлашганимда, уларнинг барчаси ўз истаги билан келганини билдирди. Бу ёшлар Ватан ва унинг нури истиқболли, эртанги тараққиётга бефарқ эмаслигидан далолатдир, — дейди 1-республика тиббиёт коллежидаги «Камолот» ЁИХ бошлангич ташкилоти етакчиси Нилуфар Тўраева.

СИРДАРЁ БЎЙЛАРИДА

Истиқлол айёми арафасида амалга оширилган умумхалқ хайрия ҳашари Сирдарёда ҳам кўтаринки руҳда ўтказилди. Ҳашар баҳонасида эл-улус тўпланиб, аввало, ўз хонадонларида, кўчаларида, маҳалласида, сўнг меҳнат жамоалари билан биргаликда ишхоналари атрофида кенг қўламли ободонлаштириш ишларини бажаришди.

Ҳашарчилар гул кўчатлари ва дов-дарахтларга шакл бериб, чор атрофни турли чиқиндилардан тозалашди. Сирдарёликлар икки кун давомида 396,3 гектар майдон, 499,9 километр ариқ ва лотоклар, 198 та зиёратгоҳ ва қабристонни тозалаш, ободонлаштирди. 1,278 тонна маиший ва қурилиш чиқиндилари чиқариб ташланди. Ҳашарчилар томонидан 278895 дона дарахт оқланиб, шакл берилди. Вилоятда ҳашар йўли билан 4562 та уй-жой таъмирланди.

Ушбу умумхалқ ҳашарида «Камолот»чилар ва сардорлар алоҳида жонбозлик кўрсатишди.

ОБОД ЮРТ ЖАМОЛИ

Тозалик бор жойда хосият бор, дея билишган навоийликлар ҳам ҳашарда фаол иштирок этишди. «Камолот»чилар дастлабки ишни Ҳаракатнинг вилоят кенгашидан бошлашди.

Асосан Навоий шаҳридаги ҳашарчиларга бош-қош бўлган вилоят кенгаши ходимлари икки юзга яқин дарахтни оқлаб, тўрт гектар ер майдонини ҳамда учта қабристон ва иккита қадамжони ободонлаштирди.

— Эрта тонгдан тўгарак аъзолари билан энгини шимариб ишга киришдик. Бундай замонавий «Ёшлар маркази»да ўқишнинг ўзи бир бахт. Бу ердаги шароитлардан унумли фойдаланиш, уни асраб-авайлаш ҳар биримизнинг бурчимиздир. Ҳашар куни марказимиз янада гўзаллашди, — дейди Навоий шаҳридаги вилоят «Ёшлар маркази»нинг пазандалик тўғраги аъзоси Шоира Жиянова.

Ҳашар кунлари вилоятдаги ўн беш мингга яқин ёшлар ҳамжихатликда қирқ икки гектар майдонда ободонлаштириш ишларини бажариб, ўттиз тоннага яқин маиший ва қурилиш чиқиндиларини олиб ташлашди. Бир километр узунликдаги ариқ ва лотоклар тозаланиб, уч юз қирқ тўққизта зиёратгоҳ ва қабристонда ободонлаштириш ишлари олиб борилди. Уч мингдан ортиқ дарахтлар оқланиб, шакл берилди.

Ҳашарда иштирок этган ёшларнинг мақсади муштарак — шу юрт кўркамлиги, унинг янада гуллаб-яшнаши, ободлиги учун муносиб ҳисса қўиши. Зеро, озод ва обод юртга байрамлар ярашади.

Меҳнат ёшларни шарафлайди

«Бунёдкор» талаба-ёшлар меҳнат ҳаракати сафида ўзларини мустақил ҳаётга тайёрлаётган ёшлар кўп. Жиззах вилоятида ҳам 1344 нафар ёш ушбу меҳнат ҳаракатига аъзо бўлиб, турли соҳаларда самарали меҳнат қилди.

— Вилоятимиздаги ёшларни ёзги таътил даврида ижтимоий фойдали меҳнатга жалб этиб, уларга қўшимча даромад олиш имконини яратиш мақсадида 545 нафар ўқувчи ва талаба ҳамда 799 нафар уюшмаган маҳалла йигитларидан иборат ёшлар меҳнат гуруҳлари ташкил этилган. Иш берувчи ташкилотлар билан имзоланган шартномага асосан, улар қурилиш, ободонлаштириш ва қишлоқ хўжалиги ишларида қатнашмоқда, — дейди «Камолот» ЁИХ Жиззах вилояти кенгаши раиси ўринбосари Ориф Шукуров. — Жиззах политехника институти талабаларидан ташкил топган меҳнат ҳаракатига эса 250 нафар намунали талаба жалб қилинди.

Ушбу ҳаракатга аъзо бўлган талабалар ўтган ойнанинг бошида қурилиш ишларига йўл олаётганда ишга кузатиш маросими юқори савияда ташкил этилган эди. Вилоят ҳокимлиги, институт маъмурияти

ҳамда «Камолот»чилардан иборат вакилларнинг далдаси, кучли рағбати билан иш бошлаган талабалар бугун мавсумий ишдан ёруғ юз билан қайтишди. Улар мавсум давомида Зафаробод туманининг «Бирлик», Пахтакор туманидаги «Пахтакор», «Чаманзор», Дўстлик туманидаги «Навбахор», «Мевазор», Мирзачўл туманидаги «Фаллакор» ҚФЙларда ҳамда Арнасой туманидаги янги қурилаётган объектларда қурувчиларга кўмакчи бўлишди.

Ёшларни моддий-маънавий қўллаб-қувватлашда Ҳаракатнинг Жиззах тумани кенгаши ходимларининг ҳам ҳиссаси катта бўлаётир. Ушбу меҳнат ҳаракати фаолиятини кенгайтириш ва тизимни такомиллаштириш мақсадида туман кенгаши томонидан самарали ишлар йўлга қўйилган.

— Туманимиздаги жами еттита ҳудудда — «Қўшбармоқ», «Учтепа», «Оқолтин»,



«Гандумтош», «Зиёкор», «Тоқчилик» ва «Пахтаобод» ҚФЙларда намунали уй-жойлар барпо этилмоқда. Туман кенгаши томонидан ушбу қурилиш ишларига тумандаги 250 нафардан ортиқ уюшмаган ёшлар жалб этилди, — дейди туман кенгаши раиси Нуриддин Холматов. — Шунингдек, уларнинг ойлик машоғули, яшаш ва овқатланиш шароитлари мунтазам назорат қилинмоқда. Маданий ҳордиқ чиқаришлари учун ту-

ман маданият ва спорт ишлари бўлими билан ҳамкорликда тез-тез концерт дастурлари ташкил этиляпти. Фаол ёшлар рағбатлантириб борилмоқда.

Мавсум давомида Жиззах политехника институти талабалари ҳам илғорлик ва жонбозлик кўрсатишди. Айниқса, Дўстлик тумани «Мевазор» ҚФЙда бунёд этилаётган намунавий уй-жойлар қурилишида Шерали Умаров, Пахтакор тумани «Чаманзор»

ҚФЙдаги намунавий уй-жойларда Шоҳрух Олтинов бошқа тенгдошларига ўрнатилган бўлиб, фаол меҳнат қилди.

Жиззах туманидаги «Оқолтин» ҚФЙ ҳудудида қурилаётган уй-жойларга борган киши чинакам бунёдкорлик ишларига гувоҳ бўлади. Бу ерда меҳнат қилаётган 24 ёшли Сарвар Исроилов ҳам ўзининг бўш вақтини юртимиздаги бунёдкорлик ишларига сарфлар қилди.

— Ўтган йили ҳам намунавий уй-жойлар қурилишида иштирок этиб, ўзим ва оилам аҳтиёжи учун анчагина пул ишлаб олганман, — дейди у. — Бу йил ҳам мутасадди ташкилотлар томонидан ойлик маош, махсус кийим-кечак, тураржой, иссиқ овқат билан таъминландик. «Камолот»чилар тез-тез ҳолимиздан хабар олиб, рағбатлантириб туришди. Бу эса бизнинг ғайратимизга ғайрат қўшади.

«Бунёдкор»чилар сафи йилдан йилга кенгаймоқда. Келажакда ушбу меҳнат ҳаракати ёшларнинг ўзига хос ҳаёт мактаби бўлиб қолишига ишонамиз.

Шоди ОТАМУРОД,
«Turkiston» мухбири

Бу манзилда қуёш ботмайди

Yosh tadbirkorlar

Инсоннинг қўли гул. Бетиним меҳнати ва кучли матонати ерни обод қилишга қодир.

Уйчилик Мирзохидга фермерлик отамерос. Наманган саноат касб-хунар коллежини битиргач, фермерлик сирларини иш юритувчи бўлиб ишлаётган кезлариданоқ ўргана бошлади. Ниҳоят, 2011 йилда ўз маблағи ҳисобидан «Мирзааҳмад ота ўғли Нурмуҳаммад» фермер хўжалигини ташкил этди. 55 гектар ерга ишлов берди. Янги иш ўринларини жорий қилди. Йиллар тажрибаси, ходимларнинг ҳамжиҳатлиги самараси ўлароқ, ҳосил орта бошлади.

— Фермер хўжалигимиз, асосан, ғалла уруғчилигига ва пахтага ихтисослаштирилган, — дейди ёш тadbirkор Мирзохид Мирзааҳмадов. — Ҳар гал мавсумга пухта тайёргарлик кўрамыз. Ишларни режалаштириб оламыз. Йилдан йилга даромад ҳам ортиб бормоқда. Мисол учун, 2012 йилда бугдойдан 116 тонна ҳосил олдик. 1400 килограмм пилла ҳамда 101 тонна пахта йиғиб, 13 миллион сўм соф фойда кўрдик. Шукрки, 2013 йил ҳам биз учун серҳосил келди. Ғалла мавсумида белгиланган режани ортиғи билан бажариб, 116 тоннадан юқори натижага эришдик.

Тadbirkор деганлари тиниб-тинчимайди. Янги гоёлар ташаббуси билан яшайди. Мирзохид ҳам ана шундай уддабурон ёшлардан. Кўп тармоқли фермер хўжалигида балиқчилик ва чорвачиликни ҳам йўлга қўйган. Саккиз сотих ерда кўркамгина сув ҳавзаси барпо этиб, балиқ етиштирмоқда. Шунингдек, 24 бош қорамол ҳамда 200 тадан ортиқ парранда боқмоқда. Уттиз тупдан ортиқ мевали дарахт, тут плантацияларига экилган Испания маккажўхориси кўкка бўй чўзмоқда. Улардан олинadиган махсулотлар эса ишчи-ходимларнинг кундалик аҳтиёжларига сарфланади. Бундан ташқари, савдо дўконлари, сартарошхона каби аҳолига маиший хизмат кўрсатиш шохобчалари эл хизматида.

Мирзохид ҳар йили янги иш ўринларини

ташкил этиш бўйича илгари сурган лойиҳаларига асосан, бўш иш ўринлари ярмаркаларида мунтазам иштирок этиб боради. Бу йил ҳам йигирмата иш ўрни тўлдирилди, ишга жойлашганлардан уч нафари касб-хунар коллежи битирувчисидир.

— Ер билан тиллашган қалб хор бўлмайди, — дейди тенгдошимиз Гулсанам Тўхтаназарова. — Уйчи саноат-транспорт ва алоқа касб-хунар коллежини тамомлагач, «Мирзааҳмад ота ўғли Нурмуҳаммад» фермер хўжалигида иш бошладим. Ҳали тонг ёришмай туриб далага ошиқамиз. Куёшнинг заррин нурларида товланаётган, ўйноқи шамолда тебранаётган ғўзалару дарахтларнинг тилини тушунгандек бўласиз. Улар меҳрингиз ва меҳнатингиз тафтида кундан кунга улғайиб боради.

Гулсанамнинг туйғуларини илғагандекмиз. Дала майдонларини кўздан кечирамиз. Эртиндин очиламан, деб турган ғўзалар кўнглингизга ўзидай мусаффолик бағишлайди.

Дарҳақиқат, пахта йиғим-теримида ҳам саноқли кунлар қолди. Фермер хўжалиги аъзолари мавсумга тайёргарликни аллақачон бошлаб юборган.

— Миллий бойлигимизни нест-нобуд этмай йиғиб олиш бизнинг биринчи галдаги вазифамиз, — дейди Мирзохид суҳбат давомида. — Уч турдаги техника воситаларимиз мавсумга шай. Бу йил ҳам юқори кўрсаткичларга эришишни ният қилганмиз.

Ғўза майдонларини айланар эканмиз, ногоҳ кимнингдир «Эҳтиёт бўлинг, ҳар бир япроқ биз учун азиз», деган гапидан хушёр тортдик. Ҳайрон бўлдик, лекин захматкаш меҳнат аҳлининг миллий бойлигимизга бўлган хурмати бизни тўлқинлантириб юборди.

Ойдина РЕЖАББОВА,
Наманган вилояти

Ma'naviyat

Аждодларимиздан қолган бой маданий меросни ўрганиш, асраб-авайлаш, ёшлар орасида тарғиб этишда Президентимиз ташаббуси билан Сурхондарё вилоятининг Термиз шаҳрида бунёд этилган археология музейи муҳим аҳамият касб этади.

Мозий садоси

Айни пайтда мазкур музейда турли археологик қазилмалар ва изланишлар махсули ўлароқ тўпланган 81830 та ноёб экспонат сақланади.

— Ҳар бир мамлакатнинг маданий ҳаётида, унда улғаяётган ёшлар тафаккури камолотида осори-атиқаларнинг, мамлакат тарихини ўрганишнинг аҳамияти катта, — дейди Термиз археология музейи директори, тарих фанлари номзоди Исмоил Ботиров. — Шу маънода, ходимларимизнинг жаҳон музейшунослигидаги илғор тажрибаларни ўрганиб, ҳаётга татбиқ этиши учун бир қатор илмий-тадқиқот мавзасалари билан ҳамкорлик олиб боряпмиз. Қолаверса, юртимиз ва хорижда ўтказилаётган кўргазмалар орқали мамлакатимизнинг бой тарихи, бугунги ютуқлари билан дунё жамоатчилигини таништиряпмиз.

Бундан икки йил муқаддам музей катта илмий ходими, тарих фанлари доктори Шопўлат Шайдуллаев ва Мюнхен университети илмий ходими Кай Канют бошчилигидаги гуруҳ Шеробод туманидаги Тиллабулоқ ва Араббулоқ ёдгорликларида археологик қазилмалар олиб бориб, Ўзбекистон ҳудудида шаклланган қадим давлатчилик тарихи охириги тахминлардан уч аср кўҳнароқ эканига асос бўладиган, аждархо қиёфаси тасвирланган муҳрни топди. У Мюнхен шаҳридаги махсус лабораторияда текширувдан ўтказилгач, милoddан аввалги XX асрга тегишли экани маълум бўлди. Натижада ўзбек археологияси тарихида янги саҳифа очилди. Чунки шу пайтга қадар қадим давлатчилигимиз тарихи Жарқўтон ёдгорлиги мисолида милoddан аввалги XVII асрга бориб тақалади, деб ҳисобланар эди.

Бойсун туманидаги Қўрғонзол ёдгорлигидан милoddан аввалги IV асрга мансуб сопол ванна топилиши жаҳон миқёсида катта шов-шувга сабаб бўлди. Бу топилма халқимиз азалдан маданияти тараққий этганига ёрқин исботдир. Бу каби мисоллар Термиз археология музейи фаолиятида кўп. Айни пайтда музей илмий ходимлари янги археологик топилма устида иш олиб бормоқда. Уларнинг айтишича, бу топилма олдингиларидан кам аҳамиятга эга эмас.

Наргиза РАҲМАТУЛЛАЕВА,
«Turkiston» мухбири

Yurtning fidoyi farzandlari

Йигитнинг юраги ёниб турсин!

Мудофаага кўмаклашувчи «Ватанпарвар» ташкилоти Бекобод шаҳар кенгаши ўқув-спорт, техника клуби томонидан олиб борилаётган оммавий тадбирлар ёшлар фаоллигини оширишда муҳим ўрин тутмоқда.

Ташкилотда таълим олувчи ёшларга алоҳида эътибор билан қаралади. Автомобиль тузилиши ва ундан фойдаланиш ҳамда автомобилни бошқариш ва ҳаракат хавфсизлиги асослари ўқув хоналари замонавий автомобилларнинг эҳтиёт қисмлари ва плакатлар билан таъминланган. Ўқув гуруҳларида ўқувчилар давоматига катта эътибор қаратилади, ўқувчилар билим савияси, ўқитувчиларнинг олиб бораётган машғулоти нозоратга олинган. Фанларни ўзлаштириш, билим сифатини ошириш, электрон дарсликлар ёрдамида машғулоти-

ларни олиб бориш мақсадида компьютер синфи ташкил этилган.

Ўтган саккиз ой мобайнида автомобиль ҳайдовчиларини тайёрлашнинг сифат кўрсаткичига алоҳида аҳамият берилганлиги эътиборга молик. 16 та ўқув гуруҳи ташкил этилиб, ҳозиргача юз нафар «В» тоифали, 75 нафар «В», «С» тоифали ҳайдовчи тайёрланди. Йўл-транспорт нозорати ходимлари билан ҳамкорликда олиб борилаётган ишлар, шубҳасиз, малякали ҳайдовчилар тайёрлашда қўл келмоқда.

Ташкилотда олиб борилаётган маънавий-маъри-

фий тадбирларнинг барчаси ўқувчи-ёшларни ҳарбий ватанпарварлик, юртга садоқат руҳида тарбиялашга қаратилган. Бу борада шаҳардаги вояга етмаганлар ўртасида турли мавзуларда ўтказилган тадбирлар, давра суҳбатлари, спорт мусобақалари яхши самара беряпти.

Айниқса, «Обод турмуш йили» муносабати билан қатор тадбирлар амалга оширилди. Кам таъминланган оилалар фарзандларининг имтиёзли ўқитилаётганлиги ҳам ибратлидир. Маҳаллаларга, турли ташкилотларга оталиқ ёрдами кўрсатилляпти.


Коллежлараро ўтказиб келинаётган «Ёш чегарачилар» мусобақаси иштирокчилари, пневматик милтиқдан ўқ отиш, ёзги биатлон каби спорт турлари бўйича ўтказиб келинаётган мусобақалар қатнашчилари,

ғолиб ва совриндорлар ташкилот томонидан диплом ва эсдалик совғалар билан тақдирланади.

— Ташкилотимиз томонидан жуда кўплаб оммавий, маънавий-маърифий тадбирлар ўтказилиши одат тусига кирган, — дейди ташкилот раҳбари Зафар Деҳқонов. — Бу, биринчидан, ёшларимизни ҳар томонлама чиниқтириб борса, иккинчидан, уларни ижтимоий ҳаётда янада фаол бўлишга ундайди.

Мудофаага кўмаклашувчи «Ватанпарвар» ташкилоти Бекобод шаҳар кенгаши жамоасининг айна шу кунларда олиб бораётган саъй-ҳаракати, бутун диққат-эътибори ёшларни ҳар томонлама чиниқтиришга, маънавий етук кишилар қилиб тарбиялашга қаратилган.

Ашурали БОЙМУРОД,
«Turkiston» мухбири



Дангасами ёки?!

Токиолик исми ошкор этилмаётган аёл ишга бормаслик учун ўзини занжирбанд қилиб ташлади.

Аёл эрталаб туриб ишга боргиси келмайди. Шунда у занжирдан тўр ясайди, унга ўзини боғлайди. Занжирнинг учини қулф билан қулфлаб, калитни қўли етмайдиган жойга улоқтиради. Кунни иситиш қувурига боғланган ҳолда ўтказган аёл кеч тушгач, бақриб ёрдам сўрайди. Қўшнилари полицияга хабар берадилар. Полиция келиб эшикни бузади ва уйга ўғри тушган, дея изларни қидира бошлади. Аёл эса полиция билан суҳбатда бу ишни атай қилганини тан олди. Натихада у жаримага тортилган.

Тўрт асрлик дарахт

Гонгконгда тўрт юз ёшдан ошган дарахт кесиб ташланиши мумкин. У энига анча ўсади, шу сабаб, ўзига катта жой талаб этади.

27 метр квадрат юзани эгаллаган ушбу баньян дарахти 1989 йилда боғни таъмирлаш чоғида жиддий шикастланган эди. Ҳозирда касалланган ушбу кекса дарахтнинг бошқа дарахтларга зарар етказмаслиги учун боғ маъмурияти уни кесишга қарор қилди.

Антиқа кашфиёт

Буюк Британиялик Мэтт Маккоун супермаркет аравачасини соатига нақ 113 километр тезлик билан ҳайдади.

Мотоцикл моторининг бекор туришини хоҳламаган Мэтт супермаркетдан аравачани ижарага олиб, ундан машина ясади. Сўнгра эски аэропорт йўлига чиқди. У миниб олган арава соатига 113 километр тезлик билан ҳаракатланди. Мэтт аравани ҳайдаш вақтида қаттиқ қўрқанини тан олди. Лекин унга таваккал қилиш омад олиб келди. 52 ёшли «чавандоз»нинг бу натижаси тез орада Гиннеснинг «Рекордлар» китобидан жой олса, ажаб эмас.

Сув париси юз ёшда!

Дания пойтахти Копенгагенда Сув париси эртақ қаҳрамонининг юз йиллиги нишонланди.

Тадбирда болалар учун дунёнинг етакчи хонанда ва масхарабозлари қатнашди. Ханс Кристиан Андерсеннинг ажойиб эртақ тимсоли 1913 йилда яратилган бўлиб, ўша вақтдан буён кўплаб болаларнинг севимли қаҳрамонига айланган эди. Копенгагенда ҳайкалтарош Эдвард Эриксен томонидан Сув париси ҳайкали ясалди.

Интернет манбалари асосида
Жавоҳир КАРОМАТОВ тайёрлади

Рақобат эмас, дўстлик

Баъзида энг яқин дугонанинг хатти-ҳаракатларини, ўзини тутишларини кўриб, ҳафсалам пир бўлиб кетяпти. Уртоғим менга рақиб бўлиб қолаётганга ўхшайди, ҳар соҳада менга тақлид қилади. Қизлар учун қадрдон дўст тушунчаси шундай кезларда ўзининг аҳамиятини йўқотиб қўймасмикан, деб ўйлаб қоламан. Дўстлигимизни сақлаб қолиш учун нима қилсам экан?

Манзура, Тошкент шаҳри

Саволга психолог, Тошкент молия институти ўқитувчиси Фотима Ёқубжонова жавоб беради:

— Қалин дўстлар ўртасида умумий қизиқишлар бўлгандагина улар аҳил бўлади. Унинг сизга ўхшашга ҳаракат қилаётгани рақобатга киришиш эмас, балки тақлид бўлиши мумкин. Сиз эса, бундан чўчияпсиз. Баъзи инсонларга ўзига хос қиёфасини топишдан кўра, тайёр имижни ўзлаштириб олиш осон туюлади. Аммо ҳар

бир инсон ўзининг табиатидан келиб чиқиб рақобатга киришиши табиий ҳол. Тараққиётнинг асосий мезонларидан бири ҳам рақобат саналади. Доимий интилиш, изланиш ҳеч қачон зиён қилмайди. Фақат рақобатнинг қачон ва нима учун юзага келаётганини аниқлаб олиш керак.

Дўстингизнинг қизиқишларини ҳурмат қилишингиз уни сизга янада яқинлаштиради. Ҳар бир инсоннинг ўзига яраша феъл-атвори бўлади, буни таҳлил қилишдан кўра, унга мослашиб кўринг. Яқин дугонанинг майда-чуйда ҳаракатларидан хафа бўлишдан кўра, унга нисбатан кечиримли бўлиш асло зарар қилмайди. Унинг ўз қиёфасини шакллантиришига ёрдам беринг. Баъзи камчиликларини босиқлик билан тушунтиришга ҳаракат қилсангиз, ҳар қандай тушунмовчиликлар ўз-ўзидан ҳал бўлади.

Нозима Ўктамова тайёрлади

ЎЗБЕКИСТОН РЕСПУБЛИКАСИ ПРЕЗИДЕНТИ ҲУЗУРИДАГИ ДАВЛАТ БОШҚАРУВИ АКАДЕМИЯСИ

ҚУЙИДАГИ ИХТИСОСЛИКЛАР БЎЙИЧА 2014 ЎҚУВ ЙИЛИ УЧУН АКАДЕМИЯ КАТТА ИЛМИЙ-ИЗЛАНУВЧИЛИГИ ҲАМДА МУСТАҚИЛ-ИЗЛАНУВЧИЛИГИ УЧУН ҚАБУЛ ЭЪЛОН ҚИЛАДИ

КАТТА ИЛМИЙ ХОДИМ-ИЗЛАНУВЧИЛИК:

(ишлаб чиқаришдан ажралган ҳолда ўқиш учун)

07.00.11 — **Миллий хавфсизлик муаммолари** — 3 та ўрин (тарих, ҳуқуқ, иқтисод йўналишлари бўйича);

08.00.13 — **Менежмент** — 2 та ўрин (бошқарув менежменти ва қарорлар қабул қилиш назарияси йўналишлари бўйича);

Талаб қилинадиган ҳужжатлар:

- ариза;
- маълумотнома;
- меҳнат дафтарчасининг белгиланган тартибда тасдиқланган нусхаси;
- диплом нусхаси;
- тадқиқот мавзуси бўйича эълон қилинган илмий маъруза ва докторлик диссертацияси режасининг муфассал лойиҳаси;
- илмий журналларда ва нашрларда эълон қилинган илмий мақолалар (камида **учта**) ҳамда тезислар (камида **иккита**) нусхалари;
- илмий ва илмий-педагогик фаолиятга лаёқатни аниқлаш юзаси-

дан ўтказилган тест синовидан ўтганлигини тасдиқловчи ОАК ҳужжатининг нусхаси (фан номзоди дипломига эга талабгорлар бундан мустасно);

- етакчи олимлардан бирининг уни илмий консультант сифатида белгилаш юзасидан ёзма розилиги.
- Ўзбекистон Республикаси Президенти давлат стипендияси соҳиблари тегишли ҳужжат нусхасини тақдим этадилар.

Қабул имтиҳонлари рўйхати:

- мутахассислик;
- Ўзбекистон тарихи;
- фаннинг билиш назарияси ва методологияси;
- чет тили.

Шу билан бирга, «Бошқарувда информацион технологиялар асослари» фанидан суҳбат ўтказилади.

МУСТАҚИЛ ИЗЛАНУВЧИЛИК:

(ишлаб чиқаришдан ажралмаган ҳолда ўқиш учун)

07.00.11 — **Миллий хавфсизлик муаммолари** — (тарих, ҳуқуқ, иқтисод йўналишлари бўйича);

08.00.13 — **Менежмент** — (бошқарув менежменти ва қарорлар қабул қилиш назарияси);

Талаб қилинадиган ҳужжатлар:

- ариза;
- иш жойидан тавсифнома;
- маълумотнома;
- олий таълим ёки фан номзоди тўғрисидаги дипломнинг нусхаси;
- меҳнат дафтарчасининг белгиланган тартибда тасдиқланган нусхаси;
- талабгорнинг илмий ва илмий-тадқиқот фаолиятига лаёқати юзасидан тест синовидан ўтганлигини тасдиқловчи ОАК ҳужжатининг нусхаси;
- илмий ишлар ва илмий ҳисоботлар (патентлар) рўйхати.

Ҳужжатлар шу йилнинг 15 октябрдан 15 ноябргача қабул қилинади.

Манзил:

Тошкент шаҳри Ўзбекистон шох кўчаси, 45-уй. Мурожаат учун телефон: 232-61-42.

Электрон манзил:
khuzhaniiazova73@mail.ru

Паловхонтўрага келинг!

«Kamolot» ko'zgu

Мамлакатимиз мустақиллигининг 22 йиллигига бағишлаб «Ўзметкомбинат» ОАЖ ёшлари ўртасида «Ўзбегим ўғлонлари» кўрик-танлови ташкил этилди. Лойиҳа корхонадаги «Камолот» ЁИХ бошланғич ташкилоти ва касаб уюшмаси кўмитаси билан ҳамкорликда амалга оширилди.

Финал босқичида олти нафар йигит миллий таомимиз — палов тайёрлаш шarti бўйича ўзаро беллашди. Ош танлови корхона ишчи-ходимлари учун ҳақиқий байрам сайлига айланди. Иштирокчиларнинг пазандалик бобидаги маҳоратини тажрибали ошпазлардан иборат ҳакамлар ҳайъати баҳолаб борди.

Ўзига хос ош чемпионатида 1-ўрин комбинат бошқаруви ходими Умид Тошмуродовга насиб этди. 1-навли прокат цеҳи устаси Акмал Бадалов 2-ўрин ҳамда кислород компрессор цеҳи ходими Валишер Аҳмедов 3-ўринга сазовор бўлди. Ғолиблар диплом, ошхона ва маиший техника жиҳозлари билан тақдирланди.

Беҳзод ҚОДИРОВ.

СУРАТДА: Танловдан лавҳа.



Hududlardan xabarlar: Surxondaryo

Энг фаоллар тақдирланди

Термиз шаҳридаги Маннон Уйғур номидаги Сурхондарё вилоят мусиқали драма театрида «Энг намунали хотин-қизлар кўмитаси бошланғич ташкилоти» кўрик-танловининг вилоят босқичи бўлиб ўтди.

Унда мазкур танловнинг ҳудудий босқичларида олти номинация бўйича ғолибликни қўлга киритган, вилоят босқичига йўлланма олган жами 84 та энг намунали хотин-қизлар кўмитаси бошланғич ташкилотидан вакиллари беллашди.

Уч кун давом этган кўрик-танловда иштирокчилар ўзлари ишлаган хотин-қизлар кўмитаси бошланғич ташкилоти фаолияти, хотин-қизлар масалаларини ҳал

этишда маҳалла фуқаролар йиғинлари ва «Камолот» ЁИХ билан ҳамкорликдаги ишлар ҳақида ўз тақдимотларида маълумот беришди.

Тадбирнинг охири кунинда кўрик-танлов ғолибларини тантанали тақдирлаш маросими бўлиб ўтди.

— Бугунги танловда бошланғич ташкилотимиз ғолибликни қўлга киритгани бизни бундан-да самарали меҳнат қилишга ундайди, —

деди кўрик-танловнинг «Энг намунали касб-хунар коллежи ёки академик лицейдаги хотин-қизлар кўмитаси бошланғич ташкилоти» номинацияси ғолиби, Термиз ахборот технологиялари маиший хизмат касб-хунар коллежининг хотин-қизлар кўмитаси бошланғич ташкилоти раиси Назокат Хидирова.

Шу кун вилоятнинг ижтимоий-иқтисодий ривожига ҳамда хотин-қизлар кўмитаси фаолиятини ривожлантиришдаги самарали меҳнатлари учун бир гуруҳ аёлларга Ўзбекистон Хотин-қизлар кўмитасининг диплом ва совғалари топширилди.

Maydonda sinalganlar

Шу йилнинг 17 октябридан 8 ноябригача Бирлашган Араб Амирликларида 17 ёшгача бўлган ўсмирлар ўртасида футбол бўйича жаҳон чемпионати бўлиб ўтади.

Жаҳон чемпионатида қуръа ташланди

Мусобақада дунёнинг энг кучли 24 терма жамоаси қаторида Ўзбекистон ўсмирлар терма жамоаси ҳам иштирок этади. 26 август куни Абу-Даби шаҳридаги «Fairmont Bab Al-Bahr» меҳмонхонасида чемпионатга қуръа ташланди. Терма жамоамиз «С» гуруҳидан ўрин эгаллади. Унда Дилшод Нуралиев шогирдлари Хорватия, Марокаш ва Панама ўсмирлар терма жамоалари билан кейинги босқичга чиқиш учун курашади.

Ўзбек жанг санъати спортчилари АҚШда ўтказилган XVI халқаро жанг санъатлари фестивалида 5 та олтин, 4 та кумуш ва 8 та бронза медални қўлга киритди.

Тенгдошларимизнинг муваффақияти

Ёшларимизнинг ўзбек жанг санъати тақдирини ажойиб тарзда намойиш қилгани фестивал ҳайъати аъзолари томонидан муносиб баҳоланди. Шунингдек, фестиваль раҳбари Дэвид Склэр ҳам ўзбек жанг санъати ва юртимиз ёшлари тўғрисида илиқ фикрларни билдирди. Тенгдошларимиз орасида, айниқса, Ситора Нишонова, Мафтуна Худоёрова, Хумоюн Фармонов, Мафтуна Зоирова, Комил Шукуров, Нодир Жумаев, Гулбахор Ашурова, Азамат Абдураимов, Шохруҳмирзо Мамажонов, Наргиза Хайруллаева ўз чиқишларида энг юқори натижаларни қайд этишди. Шу вақтга қадар ўзбек жанг санъати вакиллари Испания, Италия, Франция, Россия, Жанубий Корея ва Литвада ўз тақдирини ўтказган эди.

Жавоҳир ҚАРОМАТОВ,
«Turkiston» муҳбири

Мўл ҳосил гарови

Денов туманидаги «Нурбек Мирзо Муҳаммад» номи фермер хўжалигида 2013 йил мавсумида уруғлик учун экилган пахта майдонларида сифатли уруғлик жамғармасини яратишга бағишланган вилоят кўргазмали семинари бўлиб ўтди.

Семинарда дала шароитида алоҳида ғўза парвари-

шини ўтказиш тартиблари, сифатли уруғлик олиш шартлари, уруғчилик хўжалиқларига юқори навлиларини етказиб беришда амалга оширилаётган ишлар хусусида тўхталиб ўтилди.

Наргиза РАҲМАТУЛЛАЕВА,
«Turkiston» муҳбири

Ойлик-дан улуш, бунак						Авто чироғи						Кема қисми		
Сўров варақаси		Авра...		Водий-даги вилоят	Суюқ шоколад		Катта анхор	Ел, майин шабада		Ён дафтарча	Модалар шаҳри (Франция)	Азамат, пахлавон	Чизув анжоми	
				Сих ҳам куйма-син... ҳам						...чапоқ, инюк				
Анод акси		Булуғ (форсча)						Гул тури					Номла	
				Прокат, аренда						Мотоцикл русуми				
Адад, нуска	Бува, дода					Тропик мева		Галактика						
Поп-... (бодрок)				Ёгинли осмон жиҳми, абр						«Тарихи мулк» (асар)				

Тузувчи: Фаҳриддин Раҳимов

YON DAFTAR CHANGIZGA

Тилингда бўлса боллинг,
Кулиб турар иқболлинг.

Ўзбек халқ мақоли